


# Nazi Monn, Sedrun 9-2-93



hm. Mardis, ils 13 d'october 92 han ils zennis da s. Vigeli annunziau la tresta nova, ch'il Nazi hagi bandunau nus.

Diesch dis avon era el aunc serendius cun siu fegl Gabriel sil Rothorn per terror la caura capricorn. Eis ei stau l'altezzazion da legria che ha tut anetgamein teniu eri il Nazi? Enstagl da saver metter si a sia grondiusa catscha la cruna cul buc capricorn, ha el stuiu serender el spital cantunal a Cuera.

Tut pareva d'ir en bein ed el quintava

da prest saver turnar tier ils ses a casa. Mo il Tutpusent ha destinau autruisa. Pils enconuschents, ed era pils ses eis el spartius tut nunspetgadamein.

Il Nazi ei naschius ils 26 da fevrer 1916 a Sedrun. Cun ses dus frars e sia sora ha el passentau ina ventireivla affonza e bials onns da scola, aschilunsch sco quei ei stau pusseivel ils onns duront e suenter l'uiera.

Suenter scola ha il Nazi purschian maun nua ch'el vegneva duvraus e s'engaschaus sco fumegl e luver. Denteren ha el lu era acquistau la permission da carrar cun auto. El ei staus losch possessur digl emprem automobil en Tujetsch.

Quei ei lu era stau il motiv ch'el ha giu la cuida da saver menar siu capitani duront l'uaira en in vehichel pli cu-madeivel. Suenter quels onns plein temas e miserias ei il Nazi s'engaschaus sco resgiader tier siu frar Lucas ell'antteriora resgia sut la punt. Dasperas ha el augmentau las entradas cun in pign muvel. Pertgei el era buca pli persuls.

Igl onn 1951 ha el anflau la cumpagna dalla veta. La lètg cun la Margretha Tuor ha regalau ad els sis affons; quater buobas e dus buobs. Duas grevas cruschs ha la famiglia stuiu supportar

cun la mort dil frar Lucas 1982 e dil fegl vegl, il Florentin igl onn 1983. Omissduas fridas ha il Nazi purtau cun dignitat cristiana.

Il temps liber ei il Nazi mai staus lischents. Buca per nuot han treis uniuns accumpignau siu commember d'honur sil davos viadi. Quella menziun ha il Nazi survegniu dil Chor baselgia, dalla Societad da musica, nua ch'el ha procurau pil bien tact cun dus instruments enina, numnadamein la pauca e la tschinella, e dall'Uniun da catschadurs. La catscha ei stada per el il grond divertiment. Buca per nuot ha el manegiau pliras gadas, che s. Pieder stoppi guess aunc schar ir el a catscha enta parvis. El ei staus in dil fundaturs dall'Uniun da catschadurs Badus/Tujetsch igl onn 1943. Sco revisur, actuar e fidau commember ha el adina giu quita exemplaric pil beinstar dall'uniun e dalla catscha libra. Aunc igl unviern vargau ha el pervesiu e tgirau las selvaschinas ora giu las Nislas e contuorn.

Bien Nazi, Tia demanonza ei adina stada tgeua, Tiu pensum has Ti denton adempliu exemplaricamein. A nus resta ei ussa mo aunc d'engraziar per Tia sinceridad e cordialitat che nus vein adina puspei astgau retscheiver da Tei. Il Tutpusent vegli dar a Ti la duida pagaglia.

## Nazi Monn-Tuor, Sedrun



Ils 13 d'octobre 1992 annunzian ils zenns giud clutger dalla parochiala la mort da nies convischin Nazi Monn. Vischins e vischinias ein surstai dalla mort anetga, fuva el avon cuort aunc staus alla catscha da capricorns. Il Nazi ei naschius ils 26 da fevrer 1916. Ses geniturs ein stai Gion Antoni Monn, bostger, e Maria Carmelia naschida Beer. Sia affonza ha el passentau el ravugl dalla famiglia cun aunc dus frars ed ina sora. Suenter il bi temps da scola ei il Nazi s'engaschaus sco fumegl e luvrer. Curascha ed aviartadad per tut il niev ha el demussau cun acquistar la permissiun da carrar cun auto. Ella historia dalla vischnaunca resta el per adina nudaus sco emprem possessur d'in automobil.

Plitard eis el s'engaschaus sco resgiader tier siu frar Lucas. Dasperas ha el aunc trafficau sco mudest pur.

Igl onn 1951 marida el la Margreta Tuor. Sis affons, quater buobas e dus buobs, neschan ord quella ventireivla letg. Grevas cruschs han era spluntau tiel dacasa dil Nazi. Il fegl vegl, il Florentin ei sedisgraziaus mortalmein igl onn 1983 enten cavar crappa. El ha purtau quella ed autras cruschs cun forza cristiana.

Sper la veta e lavur da mintgadi ei il Nazi era staus activs pils fatgs culturals. El ei staus commember dil Chor baselgia Sedrun e dalla Societat da musica e quei biars onns, demai daventaus commember d'honur. Alla pleiv ha el surviu sco fidau ugau da s. Vigeli. Duront 22 onns, da 1947 - 1969, ha el tgirau ed administräu il menaschi dalla parochiala. Preferenza e pissiun ha el pil pli giu per la catscha. Dalla Uniun da catschadurs Badus eis el staus confundatur e biars onns eis el staus funcziunari en suprastonza. Sco fidau commember ha el aunc igl unviern vargau tgirau e pervesiu las selvaschinias.

Diesch dis avon l'anetga mort eis el plein fiug e flomma ius a catscha da capricorns. Denton, la via dil Segner ei stada previda autramein. El ha stuiu serender el spital a Cuera nua che la mort ha satuiu il Nazi. In um tgeu, sincer e cordial ha priu comiau da nus. El rruaussi en pasch.